

আজ এইচএসসি ও আলীম ফায়িল কামিলের ফল প্রকাশ এবারও ব্যাপক ফল বিপর্যয়ের সম্ভাবনা

স্টাফ রিপোর্টার : দেশের সকল মাধ্যমিক ও উচ্চ মাধ্যমিক শিক্ষা বোর্ডের ২০০২ সালের এইচএসসি, মাদ্রাসা শিক্ষা বোর্ডের আলীম (এইচএসসি সমমান), ফায়িল (ডিগ্রী সমমান) ও কামিল (মাস্টার্স সমমান) এবং কারিগরি শিক্ষা বোর্ডের এইচএসসি ব্যবসা ব্যবস্থাপনা পরীক্ষার ফলাফল আজ (বুধবার) একযোগে প্রকাশিত হবে। সংশ্লিষ্ট পরীক্ষা কেন্দ্র ও কলেজ-মাদ্রাসায় বিকেল ৪টায় এই ফলাফল পাওয়া যাবে। এবারের এইচএসসি পরীক্ষায়ও গত বছরের মতো ৭-এর পূঃ ২-এর কঃ দেখুন

ফল বিপর্যয়ের সম্ভাবনা

৮-এর পৃষ্ঠার পর
ব্যাপক ফল বিপর্যয়ের সম্ভাবনা রয়েছে বলে জানা গেছে। গতবারের এইচএসসি পরীক্ষায় সারাদেশে গড় পাসের হার ছিল মাত্র ২৬% এবং আলীমের পাসের হার ৩৬%। ফায়িলে ৪০% ও কামিলে ৮২% এ বছর ব্যাপক কড়াকড়ির কারণে প্রায় নকলমুক্ত পরিবেশে এইচএসসি পরীক্ষা অনুষ্ঠিত হওয়ায় পাসের হার কমে যাবার এবং গতবারের কাছাকাছি থাকার সম্ভাবনার কথা জানিয়েছে বোর্ড সূত্র। উল্লেখ্য, এ বছর ৭টি শিক্ষা বোর্ডের এইচএসসি, মাদ্রাসা বোর্ডের আলীম, ফায়িল ও কামিল এবং কারিগরি শিক্ষা বোর্ডের এইচএসসি ব্যবসা ব্যবস্থাপনা পরীক্ষায় সর্বমোট পরীক্ষার্থীর সংখ্যা ছিল ৭ লাখ ১৬ হাজার ৬৩৭ জন। এর মধ্যে এইচএসসিতে ৫ লাখ ৮৫ হাজার ৫৭০ জন, আলীমে ৬৭ হাজার ২৪৫ জন, ফায়িলে ২৫ হাজার ৫৪০ জন, কামিলে ৯ হাজার ৪৮০ জন এবং এইচএসসি ব্যবসা ব্যবস্থাপনায় ২৮ হাজার ৮শ' পরীক্ষার্থী রয়েছে। সারাদেশের প্রায় ১৫শ'টি পরীক্ষা কেন্দ্রে ২ হাজার ৬০৮টি কলেজসহ মোট প্রায় ৫ হাজার শিক্ষাপ্রতিষ্ঠানের এই পরীক্ষার্থীরা গত ১৬ মে থেকে ১৮ জুন পর্যন্ত অনুষ্ঠিত মাসব্যাপী পরীক্ষায় অংশ নেয়। নকল করতে গিয়ে প্রায় ৪০ হাজার পরীক্ষার্থী এবং নকলে সহায়তা করায় শতাধিক শিক্ষক এ সময়ে বহিষ্কার হয়। এছাড়া পরীক্ষায় কড়াকড়ির কারণে প্রায় ১ লাখ পরীক্ষার্থী মাঝপথে পরীক্ষা ছেড়ে চলে যায়।
শিক্ষা মন্ত্রণালয় জানিয়েছে, বোর্ড কার্যালয় কিংবা পত্রিকা অফিসে আজ কোন ফলাফল পাওয়া যাবে না। সকাল সাড়ে ১১টায় বোর্ড চেয়ারম্যানরা প্রধানমন্ত্রী বেগম খালেদা জিয়ার নিকট আনুষ্ঠানিকভাবে তাদের বোর্ডের ফলাফলের সংক্ষিপ্তসার হস্তান্তরের পর বিকেল ৪টায় সংশ্লিষ্ট সকল পরীক্ষা কেন্দ্রে ফলাফল প্রকাশ করা হবে। ফলাফল সংগ্রহের জন্য সংশ্লিষ্ট শিক্ষা প্রতিষ্ঠানের প্রধানদের স্ব স্ব পরীক্ষা কেন্দ্রে অথবা জেলা প্রশাসকের কার্যালয়ে যোগাযোগ করতে হবে। উল্লেখ্য, এইচএসসি ও আলীম-ফায়িল-কামিল পরীক্ষার ফলাফল এবারই সর্বশেষ সনাতনী পদ্ধতিতে প্রকাশিত হচ্ছে। আগামী বছর থেকে এই পরীক্ষার ফলাফল এসএসসি'র মতোই গ্রেডিং পদ্ধতিতে প্রকাশ করা হবে। ফলে ২০০৩ সাল থেকে আর কোন মেধা তালিকা পাওয়া যাবে না। এইচএসসিতে অবজেকটিভ টাইপের প্রশ্ন না থাকায় এই পরীক্ষায় গ্রেডিং পদ্ধতিতে জিপিএ-৫ প্রাপ্তিও হবে বিরল ঘটনা।